

Akilerarusiinernik Aalajangiisartut aalajangiinerat:

Ilisarnaat: 2017-561

Aalajangiisoqarpoq: novembari 9, 2017

Aalajangiinerup tamanut saqqummiunneqarnera:

Ukioq aningaasarsiorfiusoq: 2015

Sammissaq: Akileraarutit

Sammissap oqaasertai: Kalaallit Nunaannut killilimmik akileraartussaataaneq (aalajangersimasumik ingerlatsivik)

Eqikkaaneq

Naammagittaalliuut ingerlatseqatigiiffiup XX-p Kalaallit Nunaannut akileraartussaataaneranut tunngassuteqarpoq. Nammineerluni nalunaarsuiffimmik naatsorsuutinillu tiguisoqarsimanginnera pissutaalluni XX-ip killilimmik akileraartussatut Akileraartarnermut Aqutsisoqarfiup isigisimavaa, aningaasarsiallu akileraaruteqaataasussat missingerlugit angissusilersimallugit.

Akilerarusiinermut Aalajangiisartut ingerlatseqatigiiffiup killilimmik akileraartussaataanera aalajangi-usimasimavaat, kisiannili aningaasarsiat akileraaruteqaataasussat naatsorsuutitut nassiunneqartunut naapertuuttunngorlugit allanngortinneqarsimallutik. Aalajangiinermit ingerlatseqatigiiffiup Kalaallit Nunaanni aalajangersimasumik ingerlataqarsimanera, uuliasiornermullu atatillugu sanaartornermik suli-aqarsimanera pingaartinneqarsimapput.

Suliami pissutsit piviusut

XX savalimmiormiut ingerlatseqatigiiffiutigaat, taannalu ZZ-ip Kalaallit Nunaanni aatsitassanik ujarlerneranut atuinissaanullu atatillugu aqquserngiornissaq pillugu nunami allami ingerlatseqatigiiffimmik ZZ--imik isumaqatigiissusiorsimavoq. Isumaqatigiissutaasoq malillugu ZZ qaammatit marluk ullullu 20-it ingerlaneranni suliamik ingerlataqartussaasimavoq. Isumaqatigiissummi AB 92 atorineqartussaasoq aamma takuneqarsinnaavoq. AB 92-mi suliffeqarfimmi sanaartortitsinermit suli-aqartumi sulinissamut nassiussinissamullu Piumasaqaatit Nalinginnaasut pineqarput. Tamannalu isumaqarpoq XX sanaartorneq naammassippat aamma suli-aq XX-imiit ZZ-imut tunniunneqarpat ZZ-imut "Suliap naammassinera" pillugu allakkatigut nalunaassasoq. Suliassamut isumaqatigiissummi naammassinntoqarneranut nalunaarummik tunniussisoqarsimangilaq.

Naammagittaalliuutip suliarinerani ukiumut aningaasarsiorfiusumut pineqartumut aamma ukiumut aningaasarsiorfiusumut tulliuuttumut Kalaallit Nunaanni XX-ip suli-aqarpat naatsorsuutit nassiussisoqarsimavoq.

Naammagittaalliuuteqartup paasinninnera

XX isumaqarpoq makku pissutigalugit Kalaallit Nunaannut killilimmik akileraartussaataasoqanngitsaq:

- Isumaqatigiissutip sivivissusaa qaammatinik pingasunik sivikinneruvoq, tamannalu pissutigalugu Aningaasarsianit akileraarutit pillugit inatsimmi § 2, imm. 3 naapertorlugu XX killilimmik akileraartussaataasinnaanani.
- XX aatsitassanik ujarlernermet atuinernullu atatillugu aningaasarsianik pissarsisimangilaq. XX aqquserngiornermik allanillu suliaqarsimavoq, assersuutigalugulu gasimut ruujoriliornermet sanilliullugu aatsitassanut attuumassuteqarsimanani.
- XX Kalaallit Nunaata Savalimmiullu marloriaammik akileraartitsisarneq pillugu isumaqatigiisutaanni (DBO) artikel 5-imut ilaavoq, taamaammallu Kalaallit Nunaanni "aalajangersimasumik ingerlatsiveqarnani".
- Isumaqatigiissutip Kalaallit Nunaanni atulernera savalimmiormiut naatsorsuutaanut ilanngunneqarsimavoq.

Inatsisitigut malittarisassanut inatsisitigullu periutsinut innersuussinerit

Ukioq aningaasarsiorfiusoq 2010 aallartiffigalugu suliffeqarfimmut Kalaallit Nunaanni aatsitassanik ujarlernermet atuinernullu atatillugu aningaasarsianik pissarsisunut killilimmik akileraartussaataaneq atorineqalerpoq, takuuk Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi § 2, imm. 3 Inatsisartut inatsisaatigut nr. 3, 30. november 2009-mi atorineqalerpoq.

§ 2.

Imm. 3 Suliffeqarfiit aatsitassatigut pisuussutinik misissueqqissaarnermut paaanermullu attuumassuteqartunik, tamatumani aamma nunamik sajuppillatsitsinertigut misissuinermet, ruujorilersuinermet, pilersuinermik sullissinermut atatillugu kiisalu umiarsuarmik assartuinermet aamma kulbrintinik pissarsiarineqartunik ruujorikkooortitsinermut, iseritaqartut, taamatut ingerlataqarnikkut imaluunniit suliani Kalaallit Nunaanni aamma nunap imartaani aammalu Kalaallit Nunaannut atasumik nunavittap immap ataaniittup nalaani, ingerlanneqartutigut, isertitanit killilimmik akileraartussaataapput. Isertitat aalajangersima-su-mik ingerlatsivinnit malittarisassat atuuttuusut, takukkit imm. 1, nr. 10 aammalu imm. 6-imi malittarisassat, malillugit naatsorsorneqassapput.

Imm. 4 Imm. 3-mi aalajangersakkat atuutinngillat isertitat piffissami piffissaniluunniit qaammatit 12-it ingerlaneranni arlaqartuni katillugit ullut 30-t sinnerlugit sivivissuseqartumik sulinermik, siunnersuinermik assigisaasigulluunniit ingerlatsinikkut isertitaangippata. Suliat suliffeqarfimmit, suliffeqarfimmut allamut atasuusumik, ingerlatappata, ingerlatat suliffeqarfimmit atasuusumit ingerlanneqartutut isigineqassapput, ingerlatat pineqartut, suliffeqarfimmit kingulliullugu taaneqartumit ingerlatanut annertuutigut assigiissuseqarpata.

Inatsisissatut siunnersuummi immikkoortumut 3-mut nassuiaatini suliffeqarfiit sorliit aalajangersakkamut ilanngunneqarsimanersut ersersinneqarput.

Suliffeqarfittut "ujarlernermet iluaqutiginninnermullu atasoq"-tut isigineqarsinnaapput ilaatigut atortunik attartortitsineq, assersuutigalugu qillerivinnik, ruujorilersuineq ingerlatsinerlu, aqqusinermik umiarsuavinnillu pilersitsinerit, illuliornerit, nunamik sajuppillatsitsilluni nunamillu misissuinerit, ineqartitsivinnik ingerlatsineq aamma/imaluunniit kantiinamik, nujalerisitsisoqarfiit (piffimmi tassani), napparsimasunik paarsineq allallu atugarissaartitsiniutit.

Killilimmik akileraartussaataasunut aamma ilaanngillat Qallunaat, savalimmiormiut, nunanilu allamiulluunniit suliffeqarfiutaat assersuutigalugu qillerivinnik, umiarsuarnik assigisaannilluunniit bareboat-imi piumasaqaatit malillugit attartortitsineq (leasing). Qilleriviup, umiarsuup il.il. inuttaqartinnagu

tiguneqarneranut aalajangiisuvoq, qillerivimmut, umiarsuarmut il.il. atatillugu inunnik attartortitsisumi atorfeqartitaasunik malinnaatitsineqannginnissaa.

Aammalu suliffeqarfiit misissueqqaarnernut atasut sulianik pilersuinermilluunniit ingerlatsisut aalajangersakkami pineqartut avataaniissapput. Misissueqqaarnernut tunngatillugu akuersisummik pigisaqartoq kisimi killilimmik akileraartussaassaaq, imm. 2 naapertorlugu. Tamatumunnga tunuli-aqutaasoq tassaavoq, misissueqqaarnermi suliat pingaartumik nunamik sajuppillatsitsilluni nunalla sannaanik misissuineranut tunngasutigut ilisimasanik katersinernik tunngaveqarnerat, piffissallu sulianik ingerlatsiviusut sivikitsuinnaasarlutik, taamatullu ataavartussanik sanaartornernik il.il. ingerlatsineqas-sanani.

Nassuiaatinilu akileraartussaataanerup qanoq annertutiginera aamma erseqqissarneqarpoq:

Suliffeqarfiit killilimmik akileraartussaataasut ukiut tamaasa nammineerluni nalunaarsuum-mik akiler-aaruseriffimmut tunniussisassapput isertitalu, § 2, imm. 1, nr. 10, aamma imm. 6 naapertorlugit, aalajangersimasumik ingerlatsivinnut atuuttuusunik malittarisassat malillugit naatsorsorneqassallutik. Tamanna ima isumaqarpoq killilimmik akileraarutaasussanut ilaassasut iluanaarutit amigartoorutil-luunniit, OECD-p isumaqatigiissutinut iluserititaani isummat, tamatumani pingaartumik isumaqatigiis-sutip artikel 7-iani, tunngaviusut malillugit suliffeqarfirmut killilimmik akileraartussaataasumut atatin-neqarsinnaasut, tamatumani aamma ilaapput iluanaarutit, erniasiat atuisinnaatitaanermullu akiliutit, ingerlatsineq eqqarsaatigalugu aalajangersimasumik ingerlatsivimmut toqqaannartumik atatin-neqarsinnaasut. Taamatuttaaq ingerlatsinermik tunngaveqartunik aningaasartuutit aalajangersi-masumik ingerlatsiviup angu-sarisaani ilanngaatigineqarsinnaassapput.

Aalajangersimasumik ingerlatsivik:

§ 2, imm. 1 nr. 10 malillugu inuussutissarsiummit aalajangersimasumik ingerlatsiveqartumit isertitanut Kalaallit Nunaannut killilimmik akileraartussaataaneq atuuppoq. Aalajangersakkamut nassuiaatit malillugit oqaatsip aalajangersimasumik ingerlatsiviup marloriaammik akileraartitsisoqarnissaanik isu-maqatigiissummi erseqqissaatigineqarnera pingaartinneqarpoq.

Kalaallit Nunaat Savalimmiullu DBO-mik atsiugaqarsimapput, tassanilu artikel 5-imi "Aalajangersi-masumik ingerlatsivik" pineqarpoq. Ilaatigut pineqartoq tassaavoq: "Uninnani sanalluni, sanaartorluni ikkussuillunilu sulinerit qaammatinik 6-nik sivilisunerusut".

Qaammatit pingasut qaangiunnerisigut aalajangersimasumik ingerlatsivik siullermik pineqarsimagalu-arpoq, ukiorli aningaasarsiorfiusoq 2015 aallartiffigalugu DBO-mi allannguutit assigalugit qaammatiniit pingasunit qaammatinut arfinilinnut allannguisoqarnissaa pillugu isumaqatigiissusiortoqarpoq.

DBO-mi Art. 20-mi "aningaasarsiat allat" pineqarput. Aningaasarsiat DBO-mi eqqaaneqarsimanngitsut - suminngaanneerteri apeqqutaatinngit - taamaallaat akileraartussaataasup angerlarsimaffiani aki-learuserneqarsinnaapput.

Akileraarusiinernik Aalajangiisartut aalajangiinerat tunngaviliinerallu

§ 2, imm. 3-mut nassuiaatit malillugit aqquserngiornerit umiarsualiviliorerillu sulinertut ujarlernernut atuinissanullu attuumassutilittut isigineqarmata toqqaannartumik erseqqissarneqarpoq. Taamaammat suliffeqarfiup suliaa ruujoriliorneruppat assigippaguluunniit aatsitassarsiornermi ujarlernermut atuiner-mulluunniit toqqaannartumik attuumassutilik piumasaqaataangilaq.

Taamaammat XX § 2, imm. 3-mi aalajangersakkanut ilaavoq, taamaammallu Kalaallit Nunaat suliamut ZZ-ip Kalaallit Nunaanni suliarisimasaanut akileraartitsisoqarnissaanut nammineq tunngavissaqarpoq.

Aningaasarsiat akileraaruteqaataasussat malittarisassat aalajangersimasumik ingerlatsivinnut atuuttut malillugit naatsorsorneqassapput, apeqqutaanani XX aalajangersimasumik ingerlatsiveqarnerisq imaluunniit naamik. Taamaammat Kalaallit Nunaanni akileraartarnermut tunngatillugu apeqqutaangi-laq XX aalajangersimasumik ingerlatsiveqarnermut tunngatillugu § 2, imm. 1 nr. 10-mi aalajangersak-kanut ilanngunneqassanersq, aalajangersagarlu taanna aalajangersimasumik ingerlatsiveqarneq pillugu DBO-mi artikel 5-imut naapertuuttut paasineqassaaq.

DBO-li aqquutigalugu Kalaallit Nunaat akileraarutininik akilersitsiniaasinnaangilaq. matumani XX-ip Ka-laallit Nunaanni sanaartortitsinera ima siviutugaluni aalajangersimasunik ingerlatsivimmik peqarnissaq pisariaqassalluni. Suliarineqartussanut isumaqatigiissut malillugu sanaartortitsinerit ima siviukitsi-gisimapput aalajangersimasumik ingerlatsiveqarnissaq pigineqarsimanani. AB92-ili naapertorlugu "suliap naammassinera" tunniunneqarsimangilaq, ukiumilu aningaasarsiorfiusumi tullermi Kalaallit Nunaanni ZZ-ip suliaqarsimaneranut paasissutissat pigineqarlutik. Tamatumalu kingorna Kalaallit Nunaanni sulinerup siviussusaa imatut isigisariaqarpoq DBO naapertorlugu aalajangersimasumik ingerlatsiveqarnertut kinguneqartariaqarluni, tamannalu pissutigalugu Kalaallit Nunaat akileraartitsisin-naalluni.

Akileraartarnermut Aqutisoqarfiup XX-ip Kalaallit Nunaannut killilimmik akileraartussaataitaneranut angissusiliinera aalajangiusimaneqarpoq.

Akileraartarnermut Aqutisoqarfiup aningaasarsianut akileraaruteqaataasussanut missingerlugu an-gissusiliinera naatsorsuutininut tunniunneqartunut naapertuuttumik allangortinneqarpoq.

Inatsisinut innersuussineq.

Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi, Inatsisartut inatsisaatigut nr. 3, 30. november 2009-meersutigut allangortinneqartumi § 2, imm. 3 aamma 6 kiisalu Kalaallit Nunaata Savalimmiullu marloriaammik akileraartitsisarneq pillugu isu-maqatigiissutaanni (DBO) artikel 5.